

輝縣志卷之十

輝縣知縣銀江文兆彙季榮纂修

人物志

傳曰培塿無松柏賢者之生其不
之靈鍾奇毓秀重以教化涵濡忠孝節義之士後先
相望是故志鄉賢以樹懿範志忠烈以大尊王志孝
友義俠以懋彞倫而挽頹俗至若以昭節焉而烈女
以寄跡焉而流寓以表微焉而隱逸皆風化所繫為
重也外之仙釋渡世方技濟人亦罔未可遺者應並
及之志人物

輝縣志卷之十

人物

目

鄉賢

忠烈

孝友

義俠


節烈

流寓

隱逸

仙釋

方技



鄉賢

志鄉賢者景先哲也賢如高子憂乎尚也歷宋元明
以迄我朝潛見各異要皆品正學醇望隆當時名
垂後世者披籍而閱之慨然想見其爲人是所望於
繼起之君子

周

高柴字子羔孔子弟子長不盈五尺少孔子三十
歲足不履影起蟄不殺方長不折執親之喪泣血三
年未嘗見齒爲成宰有兄死而不爲衰者聞子羔將
至遂爲衰成人曰盍則績而蠻有匡范則冠而蟬有

輝縣志卷之十

人物 鄉賢

二

綏兄則死而子羔爲之衰子羔奠其妻犯人之禾申
祥以告曰請庚之子羔曰孟氏不以是罪予朋友不
以是棄予以吾爲邑長於斯也買道而奠後難繼也
爲衛士師別人之足俄而有崩殯之亂子羔逃之走
郭門則者守門焉謂子羔曰彼有缺子羔曰君子不
踰又曰彼有寶子羔曰君子不隄又曰於此有室子
羔乃入焉旣而追者罷子羔將去謂則者曰吾不能
虧主之法而則子之足今吾在難正子報怨之時而
逃我者三何哉則者曰斷足固我之罪昔公之治臣
以法臨當論君愁然不說豈私臣哉天生君子其道

固然此臣之所以脫君也孔子聞之曰善哉爲吏其用法一也思仁恕則樹德加嚴暴則樹怨公以行之其柴子蓋其爲人智不足而厚有餘故夫子稱之曰柴也愚唐贈共伯宋封共城侯

晉

孫登字公和汲郡共城人無家屬於蘓門山爲土窟居之號蘓門先生夏則編草爲裳冬則披髮自覆善長嘯好讀易撫一絃琴見者皆親樂之性無恙怒人或投諸水中欲觀其怒登既出便大笑人見之與語不應時時遊人間每所止家輒給其衣服食飲一

輝縣志卷之十

人物 鄉賢

三

無所受辭去皆捨棄嘗往宜陽山有作炭人見之知非常人與語登亦不應魏司馬昭聞之使阮籍往觀見其人擁膝巖側籍登巖就之箕踞相對問之屹然不應與商畧終古及棲神導氣之術皆弗答籍因對之長嘯良久乃笑曰可更作籍復嘯意盡退還半嶺許聞上嘈然有聲如數部鼓吹林谷傳響顧看乃登嘯也稽康又從之遊三年問其所圖終不答康每嘆息將別謂曰先生竟無言乎登乃曰子識火乎火生而有光而不用其光果在於用光乎人生而有才而不用其才果在於用才乎故用光在乎得薪所以保

其耀用才在乎識真所以全其年今子才多識寡難
乎免於今之世矣康不能用卒如其言或謂登以魏
晉去就易生嫌疑故或黜者也

宋

林 舍字虛白早舉進士爲大理評事年三十掛冠
與蘓軾同年軾有書云先生熙朝及第壯歲休官以
節志推之賢於淵明遠矣

杜 貴仕至大尉政和三年賊犯縣境貴率二子出
禦力戰而死民賴以全孫大忠以功授侍衛親軍都

虞侯仕至鄜州觀察使

詳見
鄉墓

輝縣志卷之十

人物

鄉賢

四

元

姚 樞字公茂號雪齋其先永平柳城人遷居洛陽
公自幼力學讀書夜分不輟志期甚高宋內翰九嘉
少登科甲者重名折行位與之遊嘗謂人曰公茂負
王佐之畧其爲前輩見誰如此初與楊中書惟中比
覲太宗甚重之歲辛丑賜錦衣金符以即中牙魯瓦
赤行臺于燕時以臺長惟事貨賂遂棄官攜家來輝
墾荒雲門糞田數百畝修二水輪誅茅爲堂城中作
私廟奉祀四世堂龕宣聖容傍垂周兩程張邵司馬
六君子像讀書其間衣冠莊肅以道學自任暇時則

鳴琴百泉之上。適世而樂天。若將終身後生。薄夫或造庭除。出語人曰。幾禰吾魄。又汲汲以化民成俗爲心。自板小學語孟諸書傳之四方。時許文正公衡聞公得伊洛性理之學。盡室來輝相依。以居世祖在潛邸。以禮聘。至數陳治道數千言。世祖竒其才。使授太子經。二年以爲太子太師。不拜。改大司農。四年拜中書左丞。十年拜昭文館大學士。十二年罷昭文館。拜翰林學士承旨。後三年卒於官。壽七十八元。貞二年贈謚榮祿大夫少師文獻公。至大三年追號嘉猷程世舊學功臣。大師開府儀同三司魯國公。謚仍舊元

輝縣志卷之十

人物 輝賢

五

貞三年五月遷葬於輝

詳見元史及神道碑

姚燧字端甫。號牧菴。樞之從子。生三歲而孤。育於伯父樞。謂燧蒙暗教。督甚急。燧不能堪。楊奐馳書止之曰。燧令器也。長自有成。何以急爲。且許黜以女時。許衡與樞講道蘓門。燧年十二。遂從之遊。十八始受學於長安。時未嘗爲文。視流輩所作。惟見其不如古人。則心弗是也。二十四始讀韓退之文。試習爲之人。謂有作者風。稍就正於衡。衡亦賞其辭。且戒之曰。弓矢爲物。以待盜也。使盜得之。亦將待人。文章固發聞士子之利器。然先有能一世之名。將何以應人之見。

役者哉非其人而與之與非其人而拒之均罪也非
周身斯世之道也至元七年衛以國子祭酒教貴胄
奏召舊弟子十二人燧自太原驛致館下燧年二十
八始爲秦王府文學未幾提舉陝西四川中興等路
學校遷爲翰林直學士元貞初奉詔修世祖寔錄拜
江西行省叅知政事仁宗居藩邸開官師府燧年已
七十遣正字呂洙如漢徵四皓故事起燧爲太子賓
客未幾除承旨學士尋拜太子少傅武宗面諭燧燧
拜辭曰昔臣先伯父樞嘗除是官尚不敢拜臣何敢
受授翰林學士承旨知制誥兼修國史又四年得告

南歸中書以承旨召燧以病不赴卒於家年七十六
謚曰文燧先在蘓門山時讀通鑑綱目常病國統散
於逐年不能一覽而得其離合之槩至告病江東著
國統離合表若干卷年經而國緯之如史記諸表將
附朱熹凡例之後其學有得於許衡器識豪邁由窮
理致知反躬實踐爲世名儒爲文闕肆該洽豪而不
宕剛而不厲春容盛大西漢風宋末凋弊之習爲
之一變或謂世無知燧者曰豈惟知之讀而能句句
而得其意者猶寡燧曰世固有厭空桑而思聞鼓缶
者乎然文章以道輕重道以文章輕重彼復有班孟

聖者出表古今人物九品中必以一等置歐陽子則
爲去賢聖也有級而不遠其文雖無謝尹之知不害
於行後豈有一言幾乎古而不聞之將來乎當時孝
子順孫欲發揮其先德必得熈文始可傳信其不得
者每爲愧耻蓋自延祐以前之文章大匠莫之能先
也有牧菴文集若干卷行於世

姚 煒字顯甫號誠齋樞之子年十六元世祖官以
禮部郎中蓋異數也長居官忠厚清慎克紹先烈歷
官中奉大夫河南北廉使陝西行中書省叅知政事
卒贈推忠秉德佐治功臣光祿大夫河南江北等處
輝縣志卷之十

人物 鄉賢

七

行中書省平章政事柱國追封魯國文忠公

張思明字士瞻其先獲嘉人徙居輝州遂家焉少穎
悟過人讀書日記千言至元十九年由侍儀舍人辟
御史臺掾又辟尚書省掾嘗抱牘誦於帝前自昏達
曙音吐洪暢帝奇之明日擢大都路治中以踰越辭
改湖廣行省都事元貞元年召爲中書省檢校六曹
無滯遷戶部主事大德初擢左司都事五年轉吏部
郎中九年改集賢司直十年除江浙行中書省左司
郎中民飢首贊發廩賑濟皇慶元年遷兩浙鹽運使
歲課贏其窳請上增數思明止之曰無以一已病後

人二年召爲戶部尚書延祐元年進叅議中書省事
仁宗即位勅賜浮屠妖總之第一官五品思明持不
可帝怒召責之思明曰選法天下公器故寧違旨不
敢隳祖宗成憲使天下窺陛下淺深帝稍從之後竟
以讒出爲工部尚書帝聞其勤政如初命授宣政院
副使五年除西京宣慰使威惠並著反側以安又奏
和林運糧不便事十一條帝勞以上尊端硯會左丞
相哈散辭職不允因薦思明爲佐遂拜中書叅知政
事英宗造壽安山寺殺諫者三人而囚其二人思明
亟白中書赦之獄乃得釋拜住爲左丞相與帖木迭

兒相構思明懼禍累辭後竟誣以罪廢而家居文宗
初起爲江浙行中書省左丞陝右飢中書撥浙江鹽
課十萬錠賑之吏以爲難思明曰鮒在涸轍可復緩
耶二年復召爲中書左丞陳累朝任賢使能治民定
國之道因辭衰老告歸重紀至元三年卒年七十七
平生不治產不畜財收書至三萬七千餘卷尤明於
律與謝仲和曹鼎新同稱三絕贈推忠翊治守義忠
臣中書左丞上護國清河郡公謚貞敏

趙澄共城人德性純古動遵禮度有儒行仕終衛
州教授

王 衡字平之國子生先名道廷試引見上爲之更名衡洪武初授翰林院侍講學士

李 徵字用賢歲貢生天順六年任光祿寺監事勅授修職佐郎畧曰歷年既久克慎且勤云

李文泰字時雍成化丁酉科舉人任長清縣教諭造就人才卓有聲譽弘治六年陞翰林院侍詔弘治十一年覃恩勅授修職佐郎弘治十六年陞榮府紀善加奉議大夫食五品俸父母有疾三月冠衣不解湯

藥親嘗鄉人咸以孝稱

輝縣志卷之十

人物 鄉賢

九

陳 玉字德輝弘治庚戌進士任直隸靈璧縣知縣治行稱最選授浙江道監察御史累有建白爲時所重出按福建風裁赫然值延寇嘯聚設機蕩平捷聞孝宗嘉其功賜衣一襲正德初以事忤逆瑾謫湖廣布政司照磨旋擢令會稽又八月陞四川按察司僉事以母老不赴既歸杜門謝客非公事未嘗至公府人高其行後以撫按保奏欲擢用之辭不起卒祀鄉賢

魏 安字居仁流河東一里人國子生弘治十年授府軍右衛經歷贊佐軍政多所補益弘治十二年勅

授徵仕郎畧曰蒞事維勤論功斯最

李可登字思善文泰子弘治甲子科舉人正德十三年任大理寺司務轉兵部司務嘉靖三年因議大禮忤旨廷杖卒隆慶改元詔褒其忠贈光祿寺少卿

互見

忠烈

冀國字定甫嘉靖丁酉科舉人授直隸唐山縣知縣築城垣修學社彌盜救荒邑中大治撫按累疏薦賢能卓異行取授刑部主事民立去思碑復公舉入祀名宦時楊忠愍公以忤袁州在獄諸郎官畏袁州

莫敢與語公適典獄獨維持調護時相唱和忠愍因

輝縣志卷之十

人物 鄉賢

十

手書梅花長歌贈之一時諸名公題詠甚多彙而成帙繼改戶部歷負外郎即中釐奸剔蠹多所建明陞貴州都勻知府時土酋王世麒據險叛逆公單車之任躬率將吏設奇勦平督府上其功荷蒙欽賚銀幣嘉靖丙寅致仕馳驛旋里呈請霍教二公將輝縣瀕河沮茹盡改水田刊有江南肥田之法立石教民隆慶改元恩詔進階中憲大夫享年八十有二無疾而逝公舉入祀鄉賢康熙八年公舉從祀蘓門山

孔廟

冀守謙字汝光國之子幼承庭訓矢志攻書效法先

賢立功過格凡婚姻死葬罔不周恤中明萬歷丙子
鄉試戊戌進士初任益都知縣會稅採初與權璫橫
逆前官皆以忤璫被逮公之任正直不阿每以理法
伏璫遂移駐他邑一方寧謚政聲稱最行取戶部主
事奉差淮安糧儲其衙署即梅軒公奉差所建公幼
年隨任讀書之處人稱橋梓繼美復差蘓松監兌聲
騰中外陞真定知府潔已愛民適當入覲抱病赴京
卒於中途舉視歸里惟有圖書數笈公居官忠直德
被一時明季祀鄉賢後於康熙八年公舉從祀蘓門
山

輝縣志卷之十

人物 鄉賢

孔廟

曹蘊清字秋林辛未進士授翰林院編修崇祀鄉賢
吉永祚字紹鎮由儒學增廣生員援例准貢崇禎五
年任陝西漢中府鳳縣主簿率二子守城死難崇祀

名宦鄉賢 詳見忠烈

國朝

孫奇逢字啟泰號鍾元直隸保定容城人明萬歷庚
子舉人少以孝聞與江村鹿忠節訂交即以荷聖學
自任安貧樂道隱然負名世之望兩朝徵聘十一次
皆辭不就天下稱之曰徵君 國初携家蘓門關兼

山堂於夏峰讀易其中四方學者聞風興起負笈絃
廬千里從遊朝右縉紳多歸里受業學者又稱夏峰
先生睢州湯潛菴嵩陽耿介石諸儒皆出其門先生
之學在體認天理而功歸慎獨凡與人論忠孝仁義
必罕譬曲喻歸諸道而後已直以庸德庸言印証天
命原初之體誠 與朝理學之宗而續濂洛關閩之
統緒者著有四書近指讀易大旨尚書近指理學宗
傳夏峰集家禮酌歲寒居獨答孝友堂家規幾輔人
物考中州人物考諸書行世年九十二歲卒葬於輝
列祀百泉書院子孫居輝世有哲人猶有理學之家

輝縣志卷之十

人物 鄉賢

十一

風馬

孫望雅字君孚奇逢第三子週歲喪母十歲始就外
傅讀書鄙章句既弱冠父命從鹿忠節公學讀羅念
菴集恍然曰學在是矣忠節大喜復教以傳習錄與
冢兄君建互証默識克然有得年三十即棄青衿以
尊聞行知爲務從徵君寓蘓門徵君沒一肩家學久
而彌新喜怒不形涵養純密論者謂君建似伯夷君
孚似柳下焉終身善病而善自誦攝年七十七鬚髮
如漆以無病卒康熙四十年祀鄉賢所著有得閒人

集行世

孫博雅字君儁奇逢第四子聰明過人好讀書不事舉子業依徵君膝下潛心性命之學凡徵君著作多博雅檢校康熙初有司奉詔徵隱逸力辭不就弟遭無妄博雅奔走救授竟死都門同人高其義私謚文孝處士康熙四十年祀鄉賢所著約齋詩行世約齋文集藏於家

互見孝友隱逸

孫淦字靜紫號擔峯望雅長子聰明異常年十一即能彈琴賦詩讀書別有領會中歲成進士官中翰慨然思有建白以發揚祖父之業一日心動遽端歸父方康健甫入門十八日父無病逝人皆謂孝感云

耀縣志卷之十

人物鄉賢

三

自是絕意仕進取祖父遺書抄錄玩索刊以行世居心光明俊偉行事務持大體善成就後學卒年六十一康熙四十年祀鄉賢所著四書醒義多前人所未發擔峯詩四卷遊記四卷行世文集六卷藏於家

紀宏謨字伯禹本遼東開原衛人入籍輝邑以父國相殉節廕授光祿寺署丞母歿廬墓三年服闋補順天府經歷調垣曲縣知縣垣居萬山中有李日貴等竊據太行所在剽劫宏謨操練鄉勇檢獲賊首四境悉平後遷大名府同知陞保定府知府寬猛適宜旗民莫不畏服康熙四十六年祀鄉賢

鄉賢續紀

鄉賢奚續以未祀鄉賢而學品志行表表傑出乎鄉也既未奉入鄉賢祠又不可湮沒而弗傳故附紀之云

明

郭野字樸菴歲貢生留心正學晚年兩目俱盲獨心服尤西川先生之為人構得所著即命二子讀而

聽之冲然自得好學之心老而彌篤

見孟雲浦孫發君集

秦銜周字維翰號蘭亭為邑貢生博極群書善古今文辭兼工書畫為河北知名士彰銜懷三郡科甲之

輝縣志卷之十

人物 鄉賢續紀

十四

選多出其門即遠者不鮮負笈者然其性情高迥浩落近古狂士風流絕不以進取為念嘗試棘園七藝成輒隨意作畫人無不為悵情秦笈曰吾特游戲耳何怪焉其畫至今傳流名人法眼以為片紙千金

張信字中孚號西銘孝事繼母友愛幼弟隣里貧乏不能婚葬者量力助之曾六次中副榜終以貢任

襄城訓導修理學宮立攻玉社課文鄉會多所成就

賢聲四達撫按採入正薦明末逆闖犯境北面死節

崇祀襄城名宦

忠烈

國朝

郭迺熙字騷臣號愚谷別號共陽居士生而穎異事親以孝聞讀書不屑制舉業從孫徵君先生遊手抄九經成帙徵君爲之序雖膺歲薦無意仕進晚年尤嗜學以正心立品爲要孟莊別業有星聚堂湯潛菴先生爲之記李滋撰共陽居士傳

楊生輝字映斗順治戊子拔貢生愚迂古拙言笑不苟於世一無所好獨好讀書官山海關通判謹守禮法一絲不苟上官咸敬禮以爲今之古人未幾掛冠歸而袖清風一經教子僻處山村隱絃繫一邑之望孫用正原名用楨字以寧號臧齋中翰淦子八歲能

輝縣志卷之十

人物 鄉賢續紀

五

屬文十二歲能詩古文辭年十四入郡庠旋膺選拔領鄉薦慨然有用世之志忽遭外艱遂淡仕進從憂戚中認取本來面目潛心家學深者所得寢處樞旁不飲酒茹葷者三年知縣陳勳旌曰古禮克敦毋楊氏年八十失明用正先意承志宗族無間言年七十丁母憂屏絕葷酒率兩孫居廬墓側者三年知縣張鏐旌曰七十廬墓乾隆七年以孝聞於朝建坊旌表初任禹州學正悉本徵君之教以教士士風丕變再鐸許昌創書院興社學去之日紳士建講堂祀之且歲時講習其中前大中丞楊雅兩公俱聘主大梁

書院講習教士惟尚躬行一洗從前陋習居恒以維
持風化爲本樂道人善如不及族衆貧乏者周之貧
甚者給以田廬捐田百畝以供家廟祭祀乾隆八年
舉鄉飲大賓所著有緘齋集十六卷增刑輝志稿八
卷卒年八十九歲葬於城北方山之陽

郭培貽邑人字燕若歲貢迓熙子選貢東銘父也孝
友性成文品兼優新輝兩邑後進多出其門人有貧
乏者不惜損己利人所以家產漸耗而中懷自淡如
也最喜溫公事無不可對人言大書壁間以自勵新
輝兩縣俱有戶口差徭考試亦得從便其來已久因

輝縣志卷之十

人物

鄉賢續紀

共

成新邑恩貢

忠烈

易著匪躬書陳篤斐義在則然也輝邑僻處山隈人多動直忠烈之士或批逆鱗或殉職守皆可以炳汗青而光史冊養士之報服古之節概可想見矣

唐

嵩里相公名字失傳嵩里公所居號也舊志稱公登第之初直諫不從觸階而殞唐延和間封直烈侯鄉人稱爲相公云

宋

杜 貴仕至大尉政和三年賊犯縣境貴率二子出

輝縣志卷之十

人物

忠烈

七

禦力戰而死民賴以全

按杜公墓誌載公諱式官穆陵關巡檢率二子力戰死事與公類蓋世遠傳訛非二杜公也但舊志

俱云杜貴未敢擅改

詳見
郵基

明

李可登字思善弘治舉人歷任兵部司務議大禮忤旨廷杖死隆慶初詔褒其忠贈光祿寺少卿祀忠義

祠

詳見
鄉賢

吉永祿國子生任陝西漢中府鳳縣主簿旣致仕流寇突至城下印官逃走公倡義督士民守城城陷公

北面再拜曰臣爲鳳縣官不敢以致仕逃局外當與
城同存亡遂罵逆寇死難長子士樞三子士模同公
死難詔贈漢中衛經歷勅建忠節坊

互見
卿賢

張 信歲貢生任襄城縣訓導逆闖梟張孤城失守
拜辭君師北面自縊氣未絕而賊至解其索欲生之
公大罵不絕口截其舌即以血書剪寇字誓爲厲鬼
以除賊賊益恨遂遇害其妻馮氏媳崔氏亦殉於難
忠孝萃一門載襄城志甚詳其子庠生張含樸冒刃
覓屍輿視歸葬

牛農夫名德富閩村里民也莊烈帝崩凶聞至牛江

輝縣志卷之十

人物

忠烈

十八

執鋤播種呼號痛楚赴百泉二閘投水死其忠烈與
西湖樵夫相類

孝友

書美君陳詩歌張仲百行之原不綦大哉輝自子蒸
以來善於事親者所在多有而執親之喪哀思廬墓
猶有泣血三年之遺風焉宰斯邑者獎勵而樹之風
其於

國朝孝治之意益庶幾乎

明

岳維祺高村社人洪武二十四年父宗岱病維祺日
侍左右春湯藥每夜拜天願損己年以益父壽及父
卒哀毀幾絕既葬廬墓三年後築墓立祠事死猶生
輝縣志卷之十
人物 孝友
鄉人咸稱其孝

十九

國朝

孫博雅字君儒少承父竒逢訓況潛理學父沒偕兄
弟結廬墓側三年不見齒弟韻雅有罪繫獄博雅具
橐餼災風朔雪日事奔籲竟客死長安士大夫高其
義致賻歸觀學者稱文孝先生

詳見
解覽

王維乾字四濱邑增生幼失怙事母曲盡甘旨遺弟
甫三歲家業漸凋維乾厚弱弟而薄以自予教諸子
以義方

耿之翰字爾良父患痿痺卧床褥不能轉側者六年

之翰日夜侍床下飲食便溺不假他人手母病寧養如父學使者以孝聞於

朝奉

旨旌表雍正七年崇祀忠義孝弟祠

孫用正字以寧居父喪寢處柩旁不飲酒茹素者二年丁母憂亦如之居廬墓側者三年乾隆七年奉

旨建坊旌表

詳見鄉賢贊紀

孫 烜週歲喪父母張氏得異病中消善食烜年八歲即能奉事弗缺病愈復發日夜數十餐烜炊爨榻側日夕不倦前後凡八載乾隆五年撫憲雅

輝縣志卷之十

人物 孝友

二十

題請准給九品頂帶仍給匾旌獎大倉沈公以其事載中州彰善錄烜現年三十歲

孫在城字亦然性成孝友七齡失怙哀切倍成人事孀母克承志意祖塋城代父廬墓三年宗黨共稱府縣學上其事學憲表旌

義俠

堯夫周麥子敬指困休哉何風之古歟世有吝鄙之夫困廩自封雖骨肉手足猶爭錙銖一行不檢即傾囊倒篋而不惜何其惑哉採睦婣任恤之士著於篇而聞風慕義者當不少矣

明

張志成化間助賑蒙朝廷賜以誥勅獎為義民

附錄旌義民誥勅勅河南衛輝府輝縣民張志國家助賑濟有司以聞朕甚嘉之今特賜勅獎諭旌為義民爾尚益敦仁惠表勵鄉俗以副朝廷褒嘉之意欽哉故勅成化三年十一月初五日

輝縣志卷之十

人物 義俠

二十一

國朝

王紫綬字金章嘗從老儒劉文奇學崇禎末劉家沒於水王為置田園廬舍於蕪門山中後年七十餘病卒為之營葬情禮甚備其哭師詩哀痛有過人者其警句云門無司馬求書使室有黔婁正被婁餘不具錄陶九成載攜李碩德玉葬其師新昌俞觀光事此近之矣事見濟南王漁陽池北偶談

孟巽祥字濬生其先祥符人隨祖父居於輝自奉儉約好義輕財聞有不謀朝夕者陰使人致粟於其門令自取之不欲使知所自來冬市綿衣施赤體者歲

以爲常康熙三十一年大饑具稟 上憲自出穀三
千石賑荒全活者以千計四十年又饑力不能賑乃
白邑令自出穀減價平糶穀不繼復以所得價自遠
方構買而賤市之邑人至今頌德不衰所著有省園
集行世

劉心道號宏陽北王里人時有濬縣王定國夫婦活
離劉輸錢贖而合之邑人段京者失銀三兩劉拾之
京尋至輒還又見苗之英遺金五十兩於呂公堂積
薪中不肯拾匿苗覓金得之喜出意外願分半與劉
劉弗受事聞於官給匾旌獎

輝縣志卷之十

人物 叢俠

三十二

高 曙任村居民年六十歲妻路氏年五十三歲無
嗣買王氏女爲妾年十六未合室曙見王涕泣狀詢
之知許字李姓爲飢寒所迫耳曙慨然還其女以配
夫不取身價逾年路氏生子名行周夫婦以壽終行
周生四子鄉里以爲陰騭之報云

李 新字建宇住城東南浦水村好行善事而無子
晚年買妾吳氏爲南康縣人日夜悲泣新聞之則家
有前子不能忘也新爲感動曰吾因無子望汝生子
乃令汝有子而忘其子於心何忍誓生還汝後其子
楊汝貞聞母在輝匍匐北來母子異得生聚時人高

李新之義爭爲詩歌以揚休美

徐希有字書年歲貢生公舉鄉飲介賓自縣遷居百泉親老弟幼舌耕瞻養節儉成家後設教趙固諸村百泉所置產業悉以與弟門徒多所成就

郭應運字素潛由膠庠入貢樸素寬厚有長者風鄉黨中有貧極不能自謀者輒周濟之別莊有地十餘頃佃戶五十餘家每因歲荒連年租負概不責償乾隆五年公舉善行邑令顧萼建坊通衢旌其門曰淳風砥俗

羅鈞字平遠資村里人有善行貧民鬪振邦幼聘

輝縣志卷之十

人物 義依

二十三

李全女爲室後全將女典與汲縣李姓爲婢無力取贖不能完配鈞捐資代贖又出數金助婚兩姓啣德又蘭陽人趙希堯客死輝邑鈞施以棺並給錢粟令其妻子歸里捨地二畝爲義塚又給道人王復亨塋地不受價前後邑令製額旌獎

謝加庫長兄早死遺一幼子昌庫撫之猶已子及成人性殊暴醉與人毆庫之子福以法言戒責昌不受且持礮棍打福頭腦裂仆地昌即亡匿地牌拿獲拘以見庫約送官究處庫泣曰吾兄止此一子今若稟官吾姪必償吾兄即絕嗣矣言畢愈痛縱之逃去後

福合日不能語者六十餘日調養半年始愈人皆以爲庫慈姪之心所感

王 林王家莊民素行好義乾隆五年有韓姓者於會上遺銀七兩三錢王拾金還主太守劉謙表其明王屋黓資村里人早孤依寡嫂事之如母及長家益貧黓胞叔無嗣家頗豐族人議以黓繼鳴之於官黓不願出嗣因擇別房爲其後至與其嫂析炊盡以家資歸嫂鄉族莫不義之

孫在洲字公潔弟在中以傷人坐釴戍父輝以所有家資析爲二欲以分於在中者鬻之以贖刑在洲以

輝縣志卷之十

人物 義俠

三十四

父在皆父業全我手足破產何惜請全鬻之成其事是年登武魁

節烈

士以忠孝傳女以節烈著皆名教首重風化攸關顧
巾幗未嘗習聞詩書講求義禮不幸失所天而矢志
靡他卒能完其貞操以報亡人於地下斯固非尋常
婦孺所得而幾者矣亦有慷慨就義以死自靖者其
志亦良足悲也用是廣蒐遠採已膺旌褒者序列
於前而幽貞未顯者以次附後或亦鼓勵之微權歟

周

共姜齊侯之女衛世子共伯之妻共伯早卒共姜守
節父母欲奪而嫁之共姜不從作栢舟之詩以死自

輝縣志卷之十

人物節烈

二五

誓節之稱於六經若此其首也今縣治左有共姜墓
即其守節處或云墓在其下

鄘風栢舟詩二章

汎彼栢舟在彼中河髡彼兩髦實
維我特之矢靡慝母也天只不諒人只

元

時氏民盧敬妻敬早亡氏年二十四自誓不踐二庭
撫育幼子時祖姑年八十餘氏竭力奉養朝夕不怠
至大三年旌表其門

趙氏民陳克敬妻敬早卒氏誓不他適奉養舅姑堅
守婦道卒全其節至正十五年旌表其門

孔氏民表瀟妻瀟死氏年二十歲無出誓從夫死家
人防甚切自愧弗獲同葬踰月餘氏卒縊死知縣劉
玉表其墓正德元年上其事奉旨勅有司旌其門

呂氏義官張嶽妻年二十六歲夫亡撫養遺孤至於
成立分司本縣履行旌獎享年八十有三

李氏生員王慶發妻即冢宰李戴太公之女也風嫻
姆訓夫亡氏年二十七歲無出飲水自守與弟婦陳
氏同居撫孤姪事孀姑勤苦不怠督學呂公獎其門
曰年踰古稀兵憲張公嘉其節移文置田以優贍之

輝縣志卷之十

人物節烈

三

縣令呂公良以布粟獎勵焉

陳氏生員王慶顯妻夫亡其子方在襁褓勵志守節
紡績不輟教子入庠事孀姑以禮督學呂公匾其門
曰一門雙節益旌二婦能繼栢舟之風也年踰六十
清操自持兵憲張公移文置田以存恤焉

張氏民夏文明妻夫亡氏年十八歲遺子七月誓將
殉焉以子幼姑殘義不容遂乃忍死携孤持家績紡
課子業儒為邑庠生清操三十餘年督學趙公旌表
其門

李氏縣掾校建才妻周藩紀善李柴之女孫也幼習

書文頗知節義夫早故撫二子三女誓不他適家貧晝夜績紡隣里不堪其苦言及適人則誓拒之苦孀三十餘載享年六十一歲司理 公旌獎之

李氏民陳力妻夫亡氏年二十三歲遺子陳王前方在襁褓氏矢志守節甘貧績紡教子業儒爲府庠生道府縣學屢給匾以旌表其門

丁氏民劉鄰妻鄰故氏年二十九生二子長五歲次三歲善事翁姑終以禮葬撫育二子承繼先業知縣劉玉以禮褒獎

郭氏生員張嵩妻夫死無子貧居事舅姑誓不適人

輝縣志卷之十

人物節烈

三七

守節三十六年知縣劉玉以布粟獎勵

張氏國學生蕪錦妻幼嫻詩禮性行端嚴年二十九夫死誓將殉焉以高堂垂白遺嗣呱呱我不容遂乃勤紡績理家務事姑生死葬祭咸遵禮法課子業儒爲邑庠生知縣高崙旌其門曰節廉冰霜

李氏民孟忠妻年十五適忠甫四年忠故守孤甘貧紡績自給劊子入庠年踰六十始終無玷本縣具申上司以禮褒獎

蔡氏民連廷魁妻家素貧氏勤女工以助其乏無稍怨尤與他婦居聞政義操行事欣慕不已纔涉戲鄙

即歛容若罔聞焉夫病百方禱救既彌晉乃懸索於大易衣潔體縊死邑令王自修爲文以祭之申其事於上憲

宋氏生員牛桃野妻夫亡子方幼冲氏甘貧績紡課子入庠有司奉文旌其門曰松筠勁節

湯氏生員周文偉妻邑令張公克儉旌曰節孝可嘉又聯云輕身世若鴻毛埋骨九原節烈與冰霜並潔重綱常如泰嶽流芳千秋聲名共日月爭鮮又詩云坤維正氣聚喪腸炮出尋常女子行避難扶姑真孝婦捐軀完節實爲良魂歸天上乾坤老名在人間草

輝縣志卷之十

人物節烈

二十八

木香恩官豈是輕褒美只因千載係綱常又聯云甘一逝以存姑孝義兩全只令女流生色矢千秋而植節身名俱美還遺夫道增光崇禎五年十月二十四日上蔡縣訓導朱子奇爲文以祭有云蠶爾流冠敢肆之凶慷慨救姑兮陳女之孝道昭然志不屈從兮投谷之節義週全視彼自經兮霄壤相懸此婦中之孝而節烈者乎

石氏民李良妻夫亡氏年二十六子甫七歲氏紡績織絰以撫其子語及適人即號哭而拒之鄉人咸稱其節

李氏民校琪妻景泰二年琪故氏年二十五歲生子
方月餘普無他志孀居二十八年始終不渝

張氏主簿王澤妻澤以監生任慶雲縣主簿明年卒
於官氏年二十七子三歲千里之外絕無親戚扶夫
柩携幼子歸葬於家守節六十六年

吳氏民齊秀妻年十八歸秀秀故氏年二十一歲當
日歛畢即縊死於室遠近咸惜之

馮氏襄城縣訓導張信之妻與夫同死難子婦崔氏
事姑至孝亦死難義人義之作詩以美之曰從來名
教攸關重何辛一門三節聞妻爲夫亡氣旣烈婦因

輝縣志卷之十

人物節烈

二十九

姑歿孝猶純疇云繼死非同死但得全倫總是倫兩
世垂芳應不泯千秋史筆永傳馨

崔氏生員張含樓妻張信之子婦信爲襄城縣訓導
氏從姑之任遇變同時死

國朝

張氏府庠生郭英之母守節撫孤俾克成立府縣區
表其門

李氏民楊汝器繼妻夫死氏年二十歲前妻子甫四
歲愛如己出績紡苦守四十餘載始終不替

崔氏郭英妻英死氏年二十五歲立志堅守養孀姑

撫孤幼三十餘年教其子郭永富入郡庠里黨群稱其節

郭氏民傅九德妻夫死氏年二十五歲家貧守志課子成名苦節六十餘年

郭氏邑庠武耀前妻耀前性僻無好合之樂平日督郭者甚刻竟至怒而出之郭守志於母家姑歿背夫成服子幼亦私相親愛及夫病供湯藥皆不令夫知夫死後治家如初撫子師孟成立以拔貢任冀州州

判

孫氏生員王景克妻年十九歸王閱四載夫故遺孩

輝縣志卷之十

人物 節烈

三十一

銳纜數月氏忍絕撫孤早歲成童以貢生候選訓導

學憲湯公題請 旌表

馬氏儒童張師孔妻年十九適張五載夫故遺孤甫

四歲家資貧寒氏既事沉疴前姑九載後事癩疾繼

姑十有五年紡績訓子其子張恭中雍正丙午副車

任扶溝縣儒學教諭孫峰望曾孫桂林俱食廩餼爲

邑庠優生皆氏苦節之報也乾隆二年蒙 旌建坊

孔氏儒童鹿泐妻年十九夫故孝事孀姑甘貧守節

教遺腹子聖基俾無失忠節公家聲後果舉孝廉氏

猶及見之乾隆初撫軍尹公題 旌

劉氏舉人孫用霖妻年二十八夫故撫嗣子守節四
十三年奉 旨旌表

楊氏生員王良卿妻乾隆七年奉 旌

孫氏廩生郭憲妻徵君元孫女年二十夫故勵志守
節孝事翁姑撫育遺孤早歲成立其子家英現食廩
餼爲邑庠優生乾隆十四年奉 旌表現年六十一
歲

孫氏儒士楊名然妻年二十二夫故子女俱無後取
姪楊地爲嗣教訓入庠守節三十二年乾隆十五年

奉 旌表

輝縣志卷之十

人物節烈

三十一

李氏生員孫煥妻年十九歸煥翁姑早歿孝事祖翁
姑先意承志夫病期以死殉夫曰死易耳宗祧爲重
夫故氏年二十七擇立嗣子以延宗祧乾隆十五年
奉 旌表

馬氏儒童王景達妻年十八夫故遺孤月餘撫養成
立事繼姑以孝稱守節三十年卒乾隆二十一年奉
旌表建坊

牛氏儒童王銑妻年二十一歲于歸閱五載銑故遺
孤三歲夭亡氏痛夫乏嗣取姪子曰湘承祧訓迪入
庠守節四十年現在請 旌

劉氏孳生孫价繼妻性端重明大義年十七子歸孝
事三世舅姑撫前女如己出夫故孤子在城南七齡
氏躬親教督俾早列邑庠爲名諸生時娣李氏亦稱
未亡人與氏共勵冰霜乾隆六年撫憲雅公旌其
門曰節並松筠現今守節三十五年

張氏童生王屋癡妻年十八夫故子幼孝事翁姑清
操三十七年郡憲王公表其門曰高節霜清

王氏候選縣丞吳鼎宣妻年二十八歲而寡取嗣子
翁旋故家無一椽片土依母家紡績以養姑姑歿葬
祭無失禮學憲張公表其門曰松筠比操

輝縣志卷之十

人物節烈

三十一

郭氏太學生馬玉藻妻徽州郡守晉熙女年十九適
玉藻玉藻病故既立嗣子決意殉節恐人誣嗣子以
不孝乃歸母家曲白隱志旋即飲砒而死邑令馬公
弔奠贈以聯府憲旌之額曰從容就義

宋氏童生齊藩妻雍正三年邑令趙希濂旌曰柏舟
再咏跋云宋其繼共姜而與日月爭光者乎早年苦
節志云貞矣爾今送養延嗣緒可謂完行於遠乎宜
加優獎以勵婦修

楊氏儒童郭際虞妻年十九歲適際虞五載夫故無
子女養翁姑守節三十年邑令趙公給匾旌曰柏舟

再咏

孫氏周鳳翔妻歸周四年夫故姑亦繼歿翁患腿疾氏奉湯藥唯謹撫遺腹子幾於有成又不幸早歿其媳何氏亦克守志邑令王公以節並松筠表其門合邑紳士以一門雙節式其閭

楊氏生員馬宏祚妻善事翁姑年二十二夫故無子立嗣承祧守節五十二年邑令徐公旌曰冰霜勁節楊氏農民張宏學母守節卒於乾隆三年年七十九歲邑令馬公匾其門曰苦節可貞

崔氏尚維妻年二十夫故子甫三歲氏奉事翁姑訓子入邑庠邑令范公以苦節可風旌其門

張氏袁丕承妻年十八夫故子昭甫數月翁姑年近花甲家貧如洗氏養老撫孤冰操四十餘年乾隆十四年二月內烈風之夜村中失火卧病在牀人懼火及各板家資伊子昭先負氏外避又扳出其父靈柩不遑家計左右兩隣俱焚伊居獨無恙人皆爲母子節孝所感云有司旌其門

賀氏生員趙銑妻年二十九歲夫故事姑勤謹姑卒克盡葬祭禮教子永清遵泮守節三十一年有司旌其門

郭氏廩生王元儒妻年十六于歸越六載夫故無子
以長門三子景湯承嗣撫育成立以廩貢司訓永城
氏守節四十六年有司旌其門

李氏廩生王福吉妻于歸氏年十七二載吉故輒縊
以殉聞者哀之合邑紳士致祭於墓有司旌其門

楊氏生員郭遂熙妻汲貢生楊其芳女年十九于歸
逾年夫故無子以姪培義爲嗣早歲舉茂才守節五
十一年有司旌其門

張氏生員王廷彥妻年十九夫故無子立族姪常吉
爲嗣復勸翁娶妾生子廷枕甫一歲翁卒氏皆撫育

輝縣志卷之十

人物 節烈

三十四

成立相繼遊泮今守節三十三年有司旌其門

朱氏紀連繼妻年二十七夫故紡績事翁姑撫前子
如已出守節五十年有司旌其門

朱氏奉祀生邵省學妻 先賢康節夫子三十代孫
婦也年十八歸邵閱十年夫故遺孤七歲家計凋零
時大荒餓莩枕藉氏拮据營生撫子思文成立亦爲
奉祀生現年六十有七苦節已經三十九載洵無愧
於柏舟有司旌其門

紀氏監生馬光祿妻年十八歸馬三月夫亡事姑撫

嗣現今三十四年有司旌其門

李氏杜澤周妻夫亡氏年二十有七養姑教子現年六十六歲有司旌其門

方氏儒童李肇驢妻年二十九夫故家貧如洗日夜紡績以事孀姑課子縱食餼於庠守節三十八年現年六十七歲有司旌其門

張氏儒童王鎬妻年二十有三而寡子曰漳甫六月家貧無依不得已就養母家訓子遊泮現今守節四十年有司旌其門

張氏陳耀明妻年二十七夫故一子二女赤貧如洗事病姑以孝聞守節五十年現年七十七有司旌其

輝縣志卷之十

人物節烈

三十五

門

鄭氏生員施駿妻年十八歸駿閱四載駿故氏甘貧守貞乾隆八年卒計守節三十年有司旌其門

蕭氏儒童劉景新妻年二十五夫故二子俱幼偕歷辛苦教子贊爲邑庠生守節三十一年有司旌其門
施氏張之炎妻年二十七夫故孝事翁姑守節三十一年卒有司旌其門

王氏冀必第妻年十八夫故誓不再嫁以承第次子爲嗣善事翁姑守節三十年有司旌其門

李氏黃大妻年十六歸黃兩月夫故姑嫜語澁氏哺

食十餘載曲承意指苦節四十九年有司旌其門

范氏生員韓守信妻年二十八夫故事姑盡道教子成立守節三十年有司旌其門

馬氏范景臣妻年十六夫故遺孤三歲甘貧守節撫子成立現年七十二有司旌其門

王氏劉玉妻年二十五夫故撫育遺子安貧守義苦節四十五年有司旌其門

郭氏生員莊遇泰妻年十七歸莊越三年夫故奉事翁姑立堂姪爲嗣清操三十餘年有司旌其門

王氏周建章妻年二十夫故事親撫孤守節三十四

年有司旌其門

梁氏楊桂妻年二十三夫故孝事舅姑守節四十三年有司旌其門

李氏郭基昌妻年二十七夫故遺孤四歲甘貧教子守節五十六年有司旌其門

李氏宋用修妻年二十五夫故事舅姑撫幼子守節三十九年有司旌其門

李氏儒童王政妻年二十九而寡孝事舅姑取姪爲嗣數載子媳相繼而亡撫遺孫王範成立守節五十

餘年現年八十八歲有司旌其門

張氏郭連章妻年二十九夫亡事姑盡道教遺腹子成立孀居三十八年康熙六十年卒有司旌其門
耿氏郭連妻年二十五歲孀故氏甘貧守節撫孤成立至今三十五年現年六十歲有司旌其門

師氏任重妻年二十五夫故姑老子幼苦志事畜現今四十四年有司旌其門

宋氏儒童王楫妻年二十夫故守節三十二年有司旌其門

郭氏生員孫燭妻年二十六夫故遺孤四歲家貧以十指供朝夕饔飧不繼晏如也守節三十三年卒有

輝縣志卷之十

人物節烈

三十七

司旌其門

趙氏蘓龍妻年二十五夫故子甫三歲脩極艱辛現今守節四十三年有司旌其門

南氏周述周妻年二十七夫故苦志紡績教子成立守節四十餘年有司旌其門

孫氏儒童王篋妻年二十夫故遺孤方數月事姑盡道教子業儒現年五十歲有司旌其門

張氏陳廷樞妻年二十七夫故家甚貧氏惟勤十指以養翁姑既歿鬻所居室以葬哭哭苦節五十一年現年七十七歲有司旌其門

郭氏高日新妻夫故氏年二十九歲守節三十四年
現年六十三歲有司旌其門

張氏闇文玉妻年十九歲夫故撫孤不再適守節六
十六年現年八十二歲有司旌其門

王氏王良臣妻夫故時氏年二十七歲子甫六歲撫
孤守志三十一年有司旌其門

全氏劉棟妻年二十二歲棟故撫週歲遺孤守節三
十七年有司旌其門

柴氏竇珍妻年二十五歲珍故子文華方八歲甘貧
守志迄今五十年現年七十五歲有司旌其門

輝縣志卷之十

人物節烈

三十八

楊氏郭英妻年二十四歲英故子景禹方一歲氏茹
苦矢志守節三十年有司旌其門

王氏李龍妻年五載夫故氏年二十四歲撫育三
歲稚子守節三十年有司旌其門

艾氏牛方妻年二十六歲牛方病故遺孤六歲氏甘
貧守志已經三十七年現年六十三歲有司旌其門

李氏王居敬妻年十六歲歸王僅年餘夫故氏孝事
翁姑志不再適迄今三十餘年有司旌其門

陳氏邑民路光玉妻年二十四歲失偶孝事翁姑慈
三子家甚貧苦矢志不改守節五十一年有司旌

其門

丁氏邑民馬士英妻年十九歲于歸閨二載夫故以矢志不二取夫胞姪爲嗣現今守節四十年有司旌其門

魏氏儒童江采妻夫故時氏年二十七歲家貧如洗姑年近花甲子甫三齡氏勤女紅孝親課子其子江如川食餼郡庠氏積勞成病卒年五十四歲遠邇俱悲其苦云有司旌其門

崔氏儒童張峯期妻年二十夫故遺孤數月且失明苦節撫養現年五十一歲有司旌其門

輝縣志卷之十

人物節烈

三十九

王氏陳天佑妻年二十二夫故遺腹子慇懃鞠育苦節終身其子至今業儒氏卒於乾隆十一年有司旌其門

周氏李淳妻年十九歲于歸越三載淳故氏孝事祖姑撫育嗣子現年六十三歲有司旌其門

孝女

附

張氏任村張仲相之女尚未出閨其母病故氏亦悲痛成疾稍愈伊父病危家貧又無稚子可恃氏割股煎湯與父食疾即瘥愈人群稱其孝焉有司旌其門

貞妾

附

明

趙氏監生吳思敬妾主婦性妬不能容使別適氏號泣歸宗僑居二載餘自繡菩薩一尊日夜祈禱願神默啟夫家悔悟庶得所歸聞翁喪仍持服盡哀時或寄衣履於夫復懇親戚通其意願執箕箒操井臼斃於吳門無所憾夫家堅拒不納其父乃訟於府斷令改適氏自傷生不逢辰夜於母家縊死遠近聞之無不嗟惋太守王公天爵爲買棺致祭令歸葬於吳復作誄文以弔之

國朝

輝縣志卷之十

人物節烈

四十

李氏河南府學訓導孟淳之妾也雍正三年孟卒於任時氏年二十七歲遺一子隨六亡氏悲痛號哭幾不欲生扶柩歸葬後身無子女苦志自安事長君朝夕承順數十年無間言守節歷三十年現年五十七歲

劉氏河南府學訓導孟淳之妾也雍正三年孟卒於任時氏年二十六歲哀毀痛切欲殉不得遺一女未幾病歿事嫡君小心承順矢志靡他守節歷三十年現年五十六歲

沈寓

江以韓受姓山以武得名古人一樓托而其地因以千古豈必於其所生哉輝擅山水之秀高人達士選勝借枝代不乏人是亦蘓門百泉所爲生色也若官游斯土果盡綉修之英則不惟人以地重地亦以人重步武前賢庶不貽林澗之媿矣乎

寓賢

晉

稽 康字叔夜譙國人以負竒才寬簡有大量土木形骸不事修飾人以爲龍章鳳姿喜談老莊尤好神

輝縣志卷之十

人物 流寓

四十一

仙服習之術博學善屬文彈琴咏詩超然於塵埃之表婚魏宗室拜中散大夫寓居山陽同遊者未嘗見其喜愠之色與阮籍山濤向秀籍兄子咸王戎劉伶相友善爲竹林之遊號稱七賢又嘗從孫登游於蘓門康居貧以鍛自給潁川鍾會爲司馬昭所昵聞康名而造之康方箕踞而鍛會至不爲禮深啣之昭嘗欲造辟康康避之河東及山濤爲選曹卽舉康自代康答書拒絕自謂不堪流俗而非薄湯武昭聞而怒焉後坐呂安事會請於昭遂見害臨刑自若援琴而鼓旣而嘆曰袁孝尼嘗從吾學廣陵散吾每固之不

與於今絕矣復爲詩自責曰欲寡其過謗議沸騰性不傷物頗致怨憎昔慚柳下今愧孫登內負宿心外惡良朋所著諸文論六七萬言皆爲世所玩詠云

宋

邵 古字天叟世爲燕人出自召公祖諱令進歷事太祖以軍校尉歸老范陽已而徙中山遷衡漳父諱德新讀書爲儒者早卒古十一歲而孤事母孝力貧且養長益好學必求義理之盡天聖中嘗登蘓門山顧謂其子雍曰若聞孫登之爲人乎吾所尚也遂隱居於山下年七十九而終性簡厚喜文字所著有正

輝縣志卷之十

人物 流寓

四十一

聲正字正音等三十篇子雍父子睦舉進士

邵 雍字堯夫幼從父古徙居共城卜隱蘓山下結廬百泉之上時居母憂布裘蔬食躬爨以養父堅志苦學共令李挺之叩門來訪勞苦之與語物理性命之學雍再拜願受業於是先示以陸淳春秋後授河圖洛書伏羲八卦六十四卦圖象雍益覃思刻勵冬不爐夏不扇夜不就席者數年安貧樂道自云未嘗攢眉名所居爲安樂窩以自雄其才慷慨有大志既學力慕高遠謂先王之事爲必可致及其學益久德益進玩心高明觀天地之運化陰陽之消長以達乎

萬物之變然後頽然其順浩然其歸一日嘆曰昔人尚友千古而吾未嘗及四方遽可已乎於是走吳適楚過齊魯客梁晉久之而歸曰道其在是矣蓋始有定居之意晚遷於洛舉遺逸試將作主簿後又以爲潁州團練推官皆辭疾不赴先生於書無所不讀著皇極經世書六十卷晚尤善爲詩平易而造於理有擊壤集二十卷自爲之序刊行於世熙寧十年卒於洛城寢舍贈秘書省著作郎後謚曰康節先生咸淳元年詔從祀孔子廟廷明崇禎間設奉祀生員典其祀世世相繼設有祭田子孫世守焉

輝縣志卷之十

人物 流寓

四十三

元

耶律楚材字晉卿遼人父履尚書左丞通術數尤邃太元私謂所親曰此子吾家千里駒也他日必成偉器且當爲異國用因取左氏語楚雖有材晉實用之以爲名字生三歲而孤稍長知力學年十七爲文有作者風身長八尺美髯宏聲博極群書旁通天文地理歷律筭術及釋老醫卜之說金末爲左右司員外郎太祖克燕召見處之左右正色立朝不爲少屈欲以身殉天下每陳國家利病生民休戚辭氣懇切孜孜不已嘗曰興一利不若除一害生一事不若減一

專人以爲名言時民多誤觸禁網而國法無赦令焚材議請肆宥且條便宜十八事頒天下悉從之汴梁將下大將欲屠之楚材馳入曰得地無民將焉用之太宗從之時居汴者得百四十七萬人楚材又求得孔子五十一代孫元楷奏襲封衍聖公付以林廟地及召名儒梁陂等進講東宮率大臣子孫執經解義置編修所於燕經籍所於平陽由是文治興焉平生不置生產家財未嘗問其出入篤於好學不舍晝夜尤嗜易學嘗避地蘊門居於衛水之涯植梅數株建琴亭月榭吟咏其中有梅溪諸詩官至中書令後贈

糧縣志卷之十

人物 流寓

甲四

太師追封廣寧王謚文正

詳見元史及神道祠堂二碑

許衡字平仲號魯齋河內人幼有異質八歲入學

從師問讀書欲何爲師曰應舉取第耳曰如斯而已乎師大奇之謂其父曰兒穎悟不凡他日必大過人吾非其師也遂辭去年十餘有道士見之驚曰骨清神完目光射人苟非命世大賢即當神超天表人間富貴不足道也稍長嗜學如飢渴而精強絕人世亂家貧無從得書聞有善本冒險數百里就而抄之讀之有疑即能有所折衷金末兵亂避居徂徠山還泰安之東館鎮區其齋曰魯人稱爲魯齋先生後適衛

友竇默尋居蕪門友姚樞及與竇默相講習既得程
朱性理諸書益大有得慨然以道爲己任既而盡室
依樞以居家貧處之泰然一時從游者甚衆時偕其
徒遊於百泉之上吟咏爲樂世祖出王秦中以姚樞
爲勤農使召衡爲京兆提學俄得請還世祖即祚召
至京日被顧問以爲太子太保不拜改國子祭酒未
幾謝病歸至元二年復召至京命議事中書省衡乃
陳五事世祖嘉納又命撰朝儀官制除中書左丞屢
辭八年以爲集賢大學士兼國子祭酒乃請徵其弟
子姚燧姚燾白棟耶律有尚等十二人爲伴讀咸驪

輝點志卷之十

人物

流寓

四十五

致之分處各齋衡教之有法一時所選國子多所成
就十年衡請還帝以問翰林學士王磐磐對曰衡教
人有法諸生行可從政此國之大體宜勿聽其去又
命諸老臣議其去留姚樞謂衡出處有關世運宜成
其志竇默復爲衡懇請之乃聽還十四年召議改歷
法仍以國子祭酒領太史院事十七年授時歷成以
疾請還懷十八年病卒年七十三衡於學無所不通
經傳子史禮樂名物星緯兵刑食貨水利要皆洞見
精微所著有孝經注大學直說中庸語意魯齊文集
及門人記載語錄行於世大德元年贈榮祿大夫大

司徒謚文正公至大三年加贈正學垂憲佐運功臣
大溥開府議同三司魏國公謚仍舊皇慶二年詔從

祀孔子廟庭

詳見元史
及神道碑

趙復字仁甫德安人以身明道姚文獻公拔德安
多方勸與俱北乃出程朱性理之書傅公由是北方
始知經學及文獻家蘊門建太極書院仁甫講授其
中風俗爲之丕變許竇諸公之文教皆先生啟之也
康熙七年崇祀十賢祠督學鄒景從爲之記

竇

默字子聲廣平肥鄉人幼讀書毅然有立志避

亂德安得伊洛性理之書以歸與姚樞許衡講學蘊

輝縣志卷之十

人物流寓

四十六

門倡明斯道中統初任於朝時王文統以言利進爲
平章政事默與許衡姚樞入侍言治亂休戚必以義
爲本文統患之且默在世祖前屢斥其學術不正乃
奏以默爲太子太傅外示尊禮內欲擯使疏遠默以
屢攻文統不中欲因東官以避禍與樞拜命將入謝
以衡議還制文統遂寢其命改授默爲翰林侍讀學
士累官至昭文館大學士卒贈太師追封魏國公謚
文正

王磐字文炳號鹿巷廣平永年人篤學勵行年方
冠從麻九疇學於鄆城容居貧甚日作糜一器晝爲

朝暮食至大四年擢進士第授歸德府錄事判官不
赴耽樂蕪門居數年弟子受業者甚衆時稱名儒世
祖聘爲翰林直學士改山東宣撫司入爲太常少卿
仕至學士承旨卒贈太傅追封洛國公謚文忠有文
集行於世

白 棟字彥隆號素菴太原人始徒行至河內從許
衡學繼衡爲國子祭酒奏召舊弟子棟自太原驛至
館下三年以爲國子助教侍裕廟東宮棟爲講鄭伯
克段於鄆已講而出裕廟語人曰是非空言意固有
在也以國史院編修從仕卽仍助教擢奉訓大夫監

輝縣志卷之十

人物 流寓

四七

察御史發阿合馬賊貪諸不法又糾鷹師西京宣尉
使倒剌沙以已憾殺其幕僚出僉陝西漢中道提刑
按察司事尋改僉燕南河北道趣裝其考已疾行至
衛而卒遂葬輝之蕪門周卜村卽授教於輝復除河
南道觀農副使以病卒亦葬蕪門姚燧撰墓碣銘稱
其學可範世行可屬俗

詳見
邱墓

王 暉字仲謀號秋澗汲人博學有俊才從王磐學
於蕪門最久中統初姚樞辟爲諫議官尋擢監察御
史論列凡百五十餘章時都水劉晟沒官糧四十餘
萬石暉劾之暴其姦利權貴側目秩滿轉平陽路總

管府判官初絳之太平縣民陳氏殺其兄行賂緩獄
蔓引逮繫者三百餘人至五年不決詔憚鞠之一訊
卽伏盡出所逮累者仕至通議大夫翰林學士承旨
知制誥同修國史文章政事知名當世追封太原郡
公謚文定所著有秋澗集百餘卷行於世

國朝

孫奇逢始居容城躬行砥礪居親喪結廬墓側於憂
戚孺慕中悟心性原本慨然以聖人可學而至天啟
乙丙間大興鉤黨左魏周橫被考掠親友避匿徵君
獨上書樞輔鳴鼓舉檣鳩衆申白生死禍福一無以

輝縣志卷之十

人物 流寓

四十八

動其中時會搶攘保全危城避亂山中隱然負名世
之望徵書累賁堅辭不就天下稱之曰徵君晚年携
家蘓門生徒數百結廬就正自姚許後再稱盛云徵
君於道慎擇而守約發爲文章皆躬行心得之餘履
道坦坦貞不絕俗使人知正心誠意之學焉

與朝理學之宗視文中紫陽何多遜焉

再見
鄭貴

李 崱字霞表保定雄縣人性安靜簡潔事親以孝
聞讀書不屑制舉業補博士弟子員有聲庠序值甲
申之變同孫徵君携家而南僑寓蘓門相與講明易
旨一時宦遊名公故家世族皆以子弟從之後設教

超化山中慕其幽勝將有卜居之志旋以病歸蕪門卒

張于度字果中容城之白溝鎮人爲督學忠毅左公所選士少孤教育諸弟成立卒讓以產孫徵君廬墓時執經就而問業後又學於鹿忠節先生未幾左魏相繼被逮孫鹿二公倡義合力拯救惟時璫災甚熾莫敢與撻而張奮激爭先出入虎口故一時競傳烈士之名後遷居蕪門自號白溝遺民從徵君講學夏峰卒葬於夏峰北原上谷魏一鰲題其墓曰白溝處士

輝縣志卷之十

人物 沉寓

四十九

耿 極字汝保號誠齋定興縣人兒時即寡言笑儼如成人九歲喪父及長從學徵君孫子於夏峯深有會於文成良知之旨常往來陳杞巨密間見者傾服如披春風厥後設教河朔從者益衆雖菜傭牧豎無不以先生稱之其學務期適用極言井田廢而治安無善術唐宗銳意有爲而房魏長孫輩沮之後儒一唱百和其說似是而非因著王制管窺一編且曰如有用我吾其朝行而夕效矣晚耽於易歸老夏峰所著有周易淺義存誠集王制管窺古本大學釋言古本中庸釋言子之翰以純孝旌另有傳

馬爾楹字構斯保定與人介節不治生產南走
蕪門就孫子問學卜數祿以居採樵自給人有饋遺
概不受孫子歿益慨然發憤爲正學負荷常姓來同
人處鼓舞振興至老不倦卒於夏峰孫先生仲子之
家所著有嘉魚草清涼散讀書筆錄三十餘卷

孫立雅字君建徵君長子純贊江村鹿忠節一見以
道學期之事繼母孝謹徵君移家蕪門獨留立雅守
祠墓後以徵君春秋高來蕪門侍晨夕徵君病重執
其手畫江村二字立雅體恪弗護集講弟講習於兼
山堂撰六約以訓之年七十六歲卒於夏峰正襟瞑

瓶縣志卷之十

人物

流寓

五十

目而逝三日頰色如生遵父遺命返葬容城先塋側
所著有增齋集十二卷宣城劉易爲之傳

續紀

續紀者何紀夫不籍於輝而輝邑山水曾被其休
光者也或嘯歌以見志或負笈以受學蕪門片石
其亦藉以不朽矣

宋

周敦頤字茂叔號濂溪道州營道縣桂陵人博學力
行闡道精妙遊蕪門與康節先生闡先天剖太極作
通書四十篇有易學易說行於世官至虔部節中擢

提點廣東路卒諡曰元封汝南伯加封道國公從祀孔廟

程 穎字伯淳河南洛陽人資性秀爽充養和粹常遊蕪門每見康節退輒歎息以爲窮聖外王之學嘉定時賜諡曰純公從祀孔廟

程 頤字正叔幼有高識非禮不動尹和靖稱之曰寬猛合宜莊重有體

國朝

湯 斌字孔伯號潛菴睢州人自少卓立年十二聽講小學退即見諸行事順治己丑捷南宮壬辰授庶

輝縣志卷之十

人物 流寓

十一

常鍵戶一室與魏象樞曹本榮以理道相切磋出任監司歷陞嶺北叅政以父老告歸潛心性理之學渡河至蕪門受業於孫徵君竒逢里居垂二十年充養愈粹屹推中原巨儒徵君屬輯洛學編斌於書無所不讀而以忠孝誠正爲本著述不爲空言後大臣交薦尋授講官直經筵敷陳深契

聖祖意擢內閣學士巡撫江蕪累陞工部尚書卒於官著有補睢州志明史稿洛學編詩文若干卷行於世配享百泉孫徵君祠乾隆初諡曰文正

耿 介字介石登封人仕至福建巡海道歸里從徵

君學於蕪門既以詹事湯斌薦授詹事府少詹尋乞
休慨然以倡明絕學爲己任興復嵩陽書院著有理
學要旨中州道學編孝經易知敬恕堂存稿行於世
卒配享百泉孫徵君祠

魏一鰲字蓮陸清苑人以進士官泗州牧歷任未久
即歸究身心性命之學聞孫徵君倡道夏峰負笈從
遊結茅廬左輯北學編手自抄錄相鄉相公題曰雪
亭徵君遺文多先生所訂云

王餘佑字申之獻縣人慷慨有大志明甲申父兄死
國難先生乃絕意仕進從徵君講學於蕪門徵君歿

輝縣志卷之十

人物 流寓

五十一

乃歸五公山中即徵君故宅改建書院與同人講習
其中自號五公山人河澗守王聘主獻陵書院多所
成就卒配享百泉徵君祠

寓宦

明

李 戴字仁夫延津人隆慶戊辰進士歷官吏部尚
書加太子太保贈少保萬歷末年占籍於輝寓資村

里南社

李 戴字道夫戴之弟廕生歷官鶴慶府知府隨兄

李戴籍於輝

郭 渴字原仲一字全小 新鄉人萬歷乙未進士歷
官禮部右侍郎追贈尚書寓居共城百泉有涵暉園
讀書遺跡

郭 澆字季昭號孟諸萬歷庚戌進士歷官陝西西
寧道布政司叅政寓居孟城塢葬孟莊東原塋

國朝

孟 元字善長原籍祥符歷任南直江寧府知府興
利除弊政蹟蔚然子二人長明台爲龍陽令次明輔
任大司馬公謙抑自處以終養歸因慕百泉山水卜
居於輝遂家焉崇祀祥符鄉賢

輝縣志卷之十

人物 流寓

五十三

王紫綬字金章號蓼航祥符人卒自成夾河灌大梁
抱一木浮出寓於輝中崇禎壬午舉人順治丙戌成
進士官翰林中允將母歸里二十年轉任江西副司
值吳逆之變贛南屬邑盡陷土寇蠶起餉道不通內
變將作鎮撫相繼歿公於萬難措置之時極盡保安
鎮定之功賑救安民思加白骨復以保薦得人退賊
饋餉亦達功在社稷而不伐讓善於人而不居當時
士大夫以爲學問經濟婉美文成信不誣也詳載贛
南去思碑陞浙江叅政急請告歸杜門吟咏立社學
遠近之士翕然從遊所著有栢菴詩選與近園詩選

倚廬詩選嵩遊吟諸刻行世

孟明台字汝爲河南祥符人選貢官知縣寄寓本縣資村里南社

孟明輔字汝翼河南祥符人崇禎庚辰進士官兵部尚書寓輝縣資村社

紀宏謨字伯禹號嵩谷邑令國相子以父國相殉節廕授光祿寺署丞歷陞保定府知府從祀鄉賢寄寓

輝縣高村里

詳見鄉賢互見恩廕

郭遇熙字駿臣新鄉縣人康熙癸卯舉人已未進士任廣東從化縣知縣行取刑部主事從祀新鄉縣鄉

輝縣志卷之十

人物流寓

五十四

賢寓輝縣

孟發祥字澹生祥符人尚書孟明輔恩廕初授奉天府推官改補光祿寺署丞輔大理寺署正陞兵部督捕員外郎寄寓輝縣資村里

再見義俠

朱禹銘字孟玉直隸大興人貢士官銜輝府通判陞開封府同知寓輝縣

高魁標字仙裴直隸滄州人由歲貢任井陘縣教諭陞廣東澄邁縣知縣歷任江南淮安府邳州知州康熙四十八年寄寓輝縣

王 馨字獻甫直隸新安縣人出戊午舉人任廣東

瓊山縣知縣瓊無五谷公致種於瓊教之樹藝瓊人
祀為神二寓輝縣胡村埋

王家琛字仲玉北直保定府容城縣人任山西五寨
守備 國初遷寓輝縣沅河二里

黃文煒字飛幟號雪鴻江南徽州府歙縣人慷慨有
大志讀書不事章句存心利人濟物幼補博士弟子
員即以天下為己任屢試棘闈不售遂援例捐知縣
康熙四十五年至輝愛百泉之勝因家焉交遊詩酒
岸然不群康熙五十五年赴郵銓選道軍前需人揀
發陝西委用辦理八里坤西藏兩處軍需勞績最著

輝縣志卷之十

人物流寓

五十五

途次遇有自口外貿易歸者六人携資共三千餘金
時天疫流行六人相繼歿於道即將其衣物銀兩各
為封記詳註鄉貫姓名寄貯蘭州庫內行文各該地
方着家屬照數領回楊公文乾曰擊其事深為嘆賞
以才德可大用代為加捐同知後因楊任廣東中丞
獲特疏薦奉 命發粵東由韶州府知府歷陞廣東
按察使歷任著有政績在臬任明允平恕所平反者
尤多民頌德焉嗣因西路軍興改授肅州叅政道

輩思諸校中奉大夫

徐天麒字護甫浙江秀水人雍正甲辰進士授庶常

擢都水司郎中出守建昌再調慶陽內陞刑部貲州
以病歸入籍輝縣

柴 璋字虹文山西平陽府太平縣人由庚子舉人
任廣東順德縣知縣陞瓊州府撫蒸海防同知又歷
陞河南懷慶府歸德府許州府江西南康府知府寄
寓輝縣北雲門里

隱逸

世際盛明而甘心林泉母乃絕物者流乎然易曰白
賁無咎傳曰崇真養素則夫守已全道亦可以愧奔
競而助雅化其風規有足多者焉堯舜在上下有巢
由豈必有所激而避人避地乎哉

孫

孫登居於蕪門山土窟之中好讀易撫琴性無恙
怒人見之與語不應魏司馬昭聞之使阮籍往觀亦
不語稽康從之遊三年聞其所圖終不答及別謂曰
先生終不言乎登曰子識火乎火生而有光不用其

輝縣志卷之十

人物 隱逸

五十七

光以全其光人生有才不用其才以全其才今子才
高識寡難乎免於今之世與後果如其言

詳見
鄉賢

元

孫之傑輝州人爲人疎曠不事生業讀書好古博涉
群籍而尤耽玩騷雅當元之季不樂仕進居貧以吟
咏自娛徜徉林壑終其身

明

彭之燦號了凡蘇縣諸生行潔而性僻明運旣革突
志澗壑拜辭先塋以孫徵君隱蕪門遂來依馬居常
儻儻俾教授生徒曰吾不能以聖賢詩書易嘯嘷也

俾賣醫卜曰吾不能與市并小兒覲顏視息也終日
不食坐死嘯臺旁曰得與公和為鄰足矣因葬嘯臺
東偏隨其志也

再見墳墓

國朝

孫博雅字君儁奇逢第四子康熙八年奉 詔舉山
林隱逸縣令舉博雅上名郡守博雅以親老力辭事
詳通志

輝縣志卷之十

人物

隱逸

五十八

仙釋

廣成談道浮邱鍊形豫固仙靈之窟乎輝自姚許趙孫以來正學倡明都人士頗知理學至頌如來慕函關如唐宋元諸人者雖其遺跡可據然事涉弗經姑存而不論論而不議可也

唐

羅公遠善隱形尤多秘異之術明皇秋晏取杖向空擲之爲大橋與遊月宮明皇求其術終不授明皇怒命高力士壓殺之瘞於後苑後中使自蜀還道逢公遠手携一履謂中使曰上之戲亦何遽也他日成都輝縣志卷之十

人物

仙釋

五十九

宋

昶公字圓明自幼穎悟精勤戒律住持白茅寺悠然自如纖塵不染達人高士皆愛與之遊一日策杖間遊謂其徒曰寺東山塢間修篁古柳異於他境乃吾棲真之所已而默坐示寂竟如其言

康衛侯世傳呂氏隱於石門遇三仙成道宋宣和七

勅封康衛侯

元

邗處機字通密自號長春子寓居蕪門與劉處元譚處端二真人研精元學世祖召見每言爲治在敬天勤民長生在清心寡欲世祖然其言命左右書之時元兵蹂踐中原河南北尤甚處機使其徒持牒招之得更生者無慮數萬人今遺蹟有三仙洞并元建集仙資福宮俱存

劉處元

上見

譚處端

上見

輝縣志卷之十

人物仙釋

本

方技

德成而上藝成而下方技奚以貴哉然濟世活人皆至理所寓而日用之不可闕者也况進乎技莫非進乎道何惜尺牘而弗為傳歟

孫奏雅字君協徵君次子具肆應才初受業於鹿忠節之門稱高足有聲庠序旋以徵君衰年多病留心醫藥取古人傳書力精探討凡陰陽氣運剛柔秉負及切脉察理藥性君臣無不觸類旁通遂精其術日錄古人諸方叅酌已意得三十卷名曰醫學宗傳六十後猶廬墓三年每以孝弟力田為孫曾誠勉年八

輝縣志卷之十

人物方技

六十一

十八歲卒

甯士均號季和世籍燕即父任蕭山令卒於官遂家於輝兄弟三人士均年最少少孤以母善病乃從孫奏雅受岐黃術若夙慧然人有以病至者每服即愈以族伯寓回隆鎮往依焉壺隱市中寒暑風雨不避且貧不計利愈不責謝負不責償並不登籍計有以藥資至者不知為誰氏亦不問幾何也性至孝以母老還輝居母喪幾減性長兄年逾八旬士均問寢視膳爬搔撫摩如竹馬肩隨時人服其友恭足式持身端謹與物謙和從未見有疾言厲色八十一歲卒

